

Evening Dogri (NSD)

17-Jan.- 2026

1915 hrs

खास खबरां

1. प्रधानमंत्री नरेन्द्र मोदी होरें अज्ज हावड़ा ते गोहाटी बश्कार भारत दी पैहली “वंदे भारत” स्लीपर रेल सेवा दी शुरुआत कीती ते आखेया जे एहदे नै पूर्वोत्तर भारत च लम्मी दूरी दी यात्रा तेज सुरक्षित ते मती आरामदायक बनोग।
2. पच्छिम बंगाल दा दौरा मुकम्मल करने दे बाद प्रधानमंत्री अज्ज संजा गोवाहाटी पुज्जे-जित्थे रोड-शो दी शक्ली च उन्दा निग्गा सुआगत कीता गया।
3. छत्तीसगढ़ दे बीजापुर च छिड़े दे इक टाकरे च सुरक्षाबलें 2 माओवादियें गी मारी मकाया ऐ।
4. अमरीकी राष्ट्रपति डोनाल्ड ट्रम्प होरें गाजा च स्थाई शांति ते अस्थाई शासन दी निगरानी लेई इक उच्ची सतह दे शांति बोर्ड दी घोषणा कीती ऐ
5. मौसम विभाग नै औंदे 3-4 दिने दौरान पंजाब ते हरियाणा च हलकी बरखा बरने दी पेशनगोई कीती ऐ।
6. “प्रधानमंत्री विश्वकर्मा” योजना दे तैहत कारीगिरें ते दस्तकारें लेई इक विशेष नमैश कल्लै थमां दिल्ली हॉट च शुरु होआ रदी ऐ।
7. 19एं बरे कोला हेठली उम्मी दे जागतें दे विश्व कप दा मैच जिम्बावे च भारत ते बंगलादेश बश्कार खेडया जा रदा ऐ।

<><><><><><>

PM -Vande Bharat

प्रधानमंत्री नरेन्द्र मोदी होरें पच्छिम बंगाल ते पूर्वोत्तर भारत च सम्पर्क गी होर बेहतर बनाने ते इस खित्ते च विकास गी रफ्तार देने दे मकसद कन्नै 3 ज्हार 250 करोड़ रपे कोला मती लागत आहली केई रेल ते बुनियादी सड़क परियोजनाएं दी शुरुआत कीती। इस मौके उनें आखेया जे मां काली दी धरती गी मां कामाख्या दी धरती कन्नै जोड़ने आहली रेल सेवा दा उदघाटन करदे होई उनेंगी मती खुशी होआ करदी ऐ। प्रधानमंत्री होरें अज्ज पच्छिम बंगाल दे मालदा रेलवे स्टेशन थमां हावड़ा ते गुवाहाटी कामाख्या बश्कार चलने आहली भारत दी पैहली “वंदे भारत” स्लीपर रेलगड्डी गी झंडी दस्सियै रवाना कीता। पूरी चाल्ली एयर कंडीशनर “वंदे भारत” स्लीपर रेलगड्डी च ब्हाई सफर आंगर दियां सुविधां उपलब्ध होगंन। एहदे नै लम्मी दूरी दी यात्रा तेज सुरक्षित ते मती आरामदायक बनोग। 16 डब्बें आहली इस

ट्रेन दी कुल छमता 823 यात्रियों दी ऐ। स्टांडे संवाददाता नै जानकारी दिती ऐ जे एह रेल सेवा आम यात्रियों- विद्यार्थियों-पेशेवरों- बपारियों- तीर्थयात्रियों ते प्रवासी मजूरें लेई मती फैयदेमंद साबत होग। स्टांडे संवाददाता कन्नै गल्लबात करदे होई- गड्डी च सफर करा रदे यात्रियों दस्सेया जे मुल्खै दी पैहली “वंदे भारत” स्लीपर ट्रेन च यात्रा करने दा मौका थोना उन्दे लेई भागें आहली गल्ल ऐ।



PM -Guwahati

पच्छम बंगाल दा दौरा मुकम्मल करने दे बाद प्रधानमंत्री अज्ज संजा असम दे दौरे लेई गोवाहाटी पुज्जे- जित्थे इक रोड शो दी शकली च उन्दा निग्गा सुआगत कीता गया। ओहदे मगरा ओ गोवाहाटी च गै बोडो समुदाय दी सगगोसार विरासत दा जश्र मनाने आहले इक ऐतिहासिक सांस्कृतिक कार्यक्रम बागरुबा द्वौ-2026 च हिस्सा लै करदे न- जित्थे बोडो समुदाय दे 10 ज्हार कोला मते कलाकार किट्टे रलियै बागरुबा नाच करै करदे ना खबरां लिखे जाने तगर कार्यक्रम चलै करदा हा।



BJP Mamta Govt.

भारतीय जनता पार्टी नै पच्छम बंगाल दी मुखमंत्री ममता बनर्जी हुंदे पर तृष्टिकरण दी राजनीति करने दा आरोप लाया ऐ। अज्ज नमीं दिल्ली च इक प्रैस कांफ्रैस गी सम्बोधित करदे होई BJP सांसद संबित पात्रा होरें दोष लाया ऐ जे ममता बनर्जी हिंसा दा स्हारा लेइयै राज्य गी बक्ख-बाहरा करने दी कोश्ट करदियां ना। उनें आखेया जे तृणमूल कांग्रेस पार्टी दी सीनियर लीडर गैर कनून- असंवैधानिक ते हिंसक तरीके दा स्हारा लेइयै राज्य च मतदाता सूचियों गी नमें सिरेया नजरसानी दी प्रक्रिया SIR गी रोकने दी कोश्ट करै करदी ऐ। उनें अग्गे आखेया जे बूथ सतह दे अधिकारियों पर दबाव बनाया जा रदा ऐ जेहदे नै उनेंगी सख्ती अपनाने पर मजबूर होना पवा करदा ऐ। पात्रा होरें आखेया जे ममता बैनर्जी हुंदे राज च राज्य दी शासन बवस्था इक चिंताजनक मोड़ पर आई गेदी ऐ कीजे तृणमूल कांग्रेस पार्टी शनाख्ती कार्ड गिरोह चलाने ते घुसपैठियों गी भारत दा नागरिक बनाने दे कम्मै च लग्गी दी ऐ।



W.B Election

पच्छिम बंगाल च तृणमूल कांग्रेस ते भारतीय जनता पार्टी बश्कार फार्म-7 गी लइयै जारी आरोप दे चलदे चुना आयोग दी सफाई आई ऐ जेहदे च आयोग नै इस गल्लै गी साफ कीता ऐ जे कुसै बी चुना हलके च इक जायज मतदाता फार्म- 7 दियां किन्नियां बी कापियां जमा कराई सकदा ऐ। आयोग मुजब इक आदमी आसेया जमा कराई जाने आहले फार्म- 7 दी गिनतरी दी कोई हद नेंई ऐ। अजें कि इस प्रक्रिया ते नियम दा गलत इस्तमाल रोकने लेई इक बवस्था रखी गेदी ऐ कि जेकर कोई आदमी 5 कोला मतियां आपत्तियां दर्ज करांदा ऐ तां दावे दी बैधनता जकीनी बनाने लेई मतदाता पंजीकरण अफसर आसेया एहदी समीक्षा करना लाजमी बनाया गेदा ऐ।



Chattisgarh Maoists Killed

छत्तीसगढ़ दे बीजापुर च अज्ज बडुलै छिडे दे इक टाकरे च सुरक्षाबलें दंडु माओवादियें गी मारी मकाया ऐ। पुलसै मुजब जिले दे उत्तर पच्छिमी इलाके दे जंगलै च माओवादियें दी मजूदगी बारे थहोई दी इक टकोहदी सूह दी बिनाह पर कार्यवाही करदे होई सुरक्षाबलें कल संवा इक सांझी टीम उत्थै भेजी- जिन्नै इलाके गी घेरियै तुपाई शुरु कीती। इस्सै दौरान अज्ज बडुलै माओवादियें कन्नै आमना-सामना होने पर टाकरा छिडी पेया- जिस दौरान दंडु माओवादियें दे मारे जाने दी तस्दीक होई ऐ।



Trump Peace Board

अमरीकी राष्ट्रपति डोनाल्ड ट्रम्प होरें गाजा च स्थाई रमानदारी ते आरजी शासन पर निगरानी रखने लेई इक उच्चि सतह दे शांति बोर्ड दी घोषणा कीती ऐ। एहदी सब्भन्तें शा खास गल्ल ऐ जे इस बोर्ड च भारतीय मूल दे अजय बंगा होरें गी शामिल कीता गया ऐ। अमरीका आसेया जारी इस पीस बोर्ड दी अध्यक्षता आपू डोनाल्ड ट्रम्प होर करगंन। भारतीय मूल दे अजय बंगा इक बडु बैकर ते विश्व बैंक समूह दे अध्यक्ष बी ऐन। अपने कुशल माली रणनीति ते वैश्विक नेतृत्व लेई मशहूर अजय बंगा हून गाजा दे पुर्ननिर्माण ते प्रशासनिक स्थिरता च अहम भूमिका निभागंन।



Riyad India Tourism

रियाद च भारतीय दूतावास ते भारतीय सैलसफा मंत्रालय नै मिलियै इक बड्डे सैलसफा प्रचार कार्यक्रम दा सरिस्ता कीता- जेहदा मकसद कुलसंसारी सतह दे सांझेदारें गी भारत दियें बन-सबन्नी यात्राएं ते सैलानी थाहरें बारे जागरुक करना ऐ। कार्यक्रम च इंडीगो ते एयर इंडिया समेत केंई प्रमुख भारतीय टूर ऑपरेटरें ते ब्हाई कम्पनियें दे प्रतिनिधियें हिस्सा लैता। कार्यक्रम दा शीर्षक हा- “भारत दी संस्कृति- विरासत ते ओहदे शा अग्गे”। इस मौके भारत दे राजदूत सुहेल एजाज़ खान होरें अपने मुख भाषण च भारत ते सऊदी अरब बश्कार ऐतिहासिक सरबंधें ते इस सांझ गी जीन्दा रखने च इक-दुए कन्नै सांस्कृतिक अदान-प्रदान ते लोकें-लोकें बश्कार गैहरें रिश्तें-सरबंधें पर लौऽ पांदे होई आखेया जे दौनें- मुल्खै बश्कार सैलसफा च उप्परोतली बाद्दा होआ रदा ऐ- जेहडा भारत ते सऊदी अरब दपक्खी सरबंधें च मजबूत रफ्तार गी बी दर्शादा ऐ।



Pak- Hindu Exabition

अमरीका च कैपिटल हिल थाहर इक कला प्रदर्शनी ते डाक्यूमेंट्री स्क्रीनिंग दा सरिस्ता कीता गया-जेहदे राएं पाकिस्तान च हिंदू ते होरनें अल्पसंख्यक समुदायें दियें चनौतियें पर नमें सिरेया ध्यान आकर्षत कीता गया। इनें चुनौतियें च जबरदस्ती धर्म-परिवर्तन- अगवाह करियै लेई जाना ते अपना घर-बाहर छुड़ियै नस्सी जाना जनेए मामलें गी उजागर कीता गया। सैवन डिकेड्स नां दी इस प्रदर्शनी च धार्मिक अल्पसंख्यकें पर असर पाने आहले शरणार्थी संकट गी दर्शाया गेदा ऐ जेहदी दुनिया च कुदरै कोई सुनवाई नैई होआ करदी ऐ। इस प्रदर्शनी दा मकसद अमरीकी सांसदें ते कांग्रेस दे कर्मचारियें गी पाकिस्तान च मनुक्खी अधिकारें दी जान बुज्जियै होआ रदी खलाफवर्जी ते घर-बाहर छुड़ियै भारत च नस्सी गेदे रिफ्युजियें दी स्थिति बारे जागरुक कराना ऐ। एहदे शा पैहले एह प्रदर्शनी लंदन- सिडनी- मेलबर्न- न्यूयार्क ते मुम्बई जनेए शैहरें च बी लग्गी चुकी दी ऐ।



Foreign Ministry Brics

भारत नै साफ कीता ऐ जे ब्रिक्स नौसैनिक अभ्यास पूरी चाल्ली कन्नै दक्खन अफ्रीका दी पैहल ही- जेहदे च किश ब्रिक्स दे सदस्य मुल्खें बी हिस्सा लैता हा। मीडिया दे इक सुआला दे परते च विदेश मंत्रालय नै आखेया ऐ जे एह कोई सामान्य जां ब्रिक्स दी संस्थागत गतिविधि नैई ही ते होर ना गै एहदे च सभ्भनें ब्रिक्स सदस्य मुल्खें हिस्सा लैता हा। मंत्रालय नै इब्बी आखेया ऐ जे भारत नै पैहले कदें इस चाल्ली दी गतिविधियें च हिस्सा नैई लेदा। मंत्रालय नै

दस्सेया ऐ जे इस संदर्भ च भारत जिस सामान्य अभ्यास च हिस्सा लैंदा ऐ ओह IBSSMR समुन्द्री अभ्यास ऐ- जेहदे च भारत-ब्राजील ते दक्खन अफ्रीका दी नौसेना किट्टै रलियै औंदियां ना पिच्छली बारी एहदा अभ्यास अक्तूबर 2024 च होआ हा।

<><><><><><>

Piyush Goel -Canada

उद्योग ते बपार मंत्री पीयूष गोयल होरें अज्ज ब्रिटिश कोलम्बिया कनाडा दे प्रधानमंत्री डेविड एबी हुंदे कन्नै भारत कनाडा आर्थिक सांझेदारी गी मजबूत करने पर चर्चा कीती। इक सोशल मीडिया पोस्ट च गोयल होरें जानकारी दिती ऐ जे गल्लबात दौरान दौने धड़े बपार ते रासपूंजी लाने दे क्षेत्र च सहयोग बधाने ते महत्वपूर्ण खनिजें- विनिर्माण- स्वच्छ ऊर्जा- शिक्षा- टैक्नालोजी- रक्षा ते नवाचार दे क्षेत्र च सहयोग बधाने दियें संभावनाएं दा पता लाने पर विचार बटांदरा कीता गया। उनें आखेया जे दौने देशे आपूं चै सरबंध्यै गी निगगर बनाने ते नमें-नमें मौके पैदा करने लेई उप्परोतली जतन ते सहयोग दे महत्वै पर सैहमती जताई।

<><><><><><>

Maharashtra Election

भारतीय जनता पार्टी नै महाराष्ट्र च 2026 दे नगर-निगम चुनाएं च 29 नगर-निगमें दीयें 2 ज्हार 869 सीटें चा इक ज्हार 425 सीटां जितियां ना। खीरी नतीजें मताबक शिवसेना गी 399- कांग्रेस गी 324- राष्ट्रवादी कांग्रेस पार्टी NCP गी 167- शिवसेना UBT गी 155- NCP शरद पवार गुट गी 36- MNS गी 13 ते बहुजन समाज पार्टी गी 6 सीटां हासल होइयां ना।

<><><><><><>

PM Vishwakarma

प्रधानमंत्री विश्वकर्मा योजना दे तैहत कारीगिरें ते शिल्पकारें गी समर्पित इक प्रदर्शनी- प्रधानमंत्री विश्वकर्मा हॉट 2026 कल्लै थमां नमीं दिल्ली दे दिल्ली हॉट च शुरु होआ रदी ऐ। प्रदर्शनी दा उदघाटन लौहके- भलेया लौहके ते दरमयानें उद्यम मंत्री जतिन राम मांझी करगंन। एहदा उद्देश्य देशै दी समृद्ध पारम्परिक शिल्प कला विरासत दा जश्र मनाना ते उसी प्रदर्शित करना ऐ। एह प्रदर्शनी कारीगिरें गी अपने हत्थै कन्नै बनाए दे उत्पादें गी राष्ट्रीय ते अंतराष्ट्रीय खरीददारें हितधारकें ते आम लोकें दे सामने प्रदर्शित करने ते बेचने आस्तै इक मंच प्रदान करोग।

Shukla Delhi

ग्रुप कैप्टन शुभांशु शुकला होंरें अज्ज नमीं दिल्ली स्थित राश्ट्रीय विज्ञान केन्द्र च वर्चुअल रियलिटी थियेटर ते पैनल प्रदर्शनी दा उदघाटन कीता। इस प्रदर्शनी दा शीर्षक ऐ- “धरती थमां कक्षा तगर –अंतरिक्ष दी खोज किट्टै मिलियै”। इस मौके पर शुकला होंरें एक्सिओम-4 मिशन च अपने अनुभव सांझे करदे होई अंतरिक्ष च जीवन ते कम्म- अंतरिक्ष यात्री सिखलाई ते धरती दी कक्षा सरबंधी चनौतियें दे बारे च जानकारी सांझी कीती।



Rashtrapati Bhawan Closed

राश्ट्रपति भवन 21 जनवरी कोला लेइयै 29 जनवरी तगर आम जनता लेई बंद रौहगा। राश्ट्रपति सचिवालय आसेया जारी इक इतलाह मुजब एह रोक औंदे गणतंत्र दिवस गी ध्यानै च रखदे होई लाई गई ऐ। सचिवालय मुजब गणतंत्र दिवस परेड ते बीटिंग रिट्रीट समारोह दे कारण आम जनता दा इत्त बक्खी जाना बंद रखेया जाहगा।



Cricket

19एं बरे कोला हेठली उम्री ICC विश्वकप दे इक मैच च भारत नै बंगलादेश दे सामने जित्त लेई 239 रन्ज दा लक्ष रखेया ऐ। जिम्बावे दे बुलावायो च टास जितियै पैहले बल्लेबाजी करदे होई भारती टीम 48 ओवर ते 4 गेदें च 238 रन्ज बनाइयै आउट होई गई। बरखा कारण मैच किश चिरे लेई रोकेया गया हा ते मैच गी 50 दे बजाए 49 ओवरें दा करी दिता गेदा ऐ। परते च बंगलादेश नै हुनै कोला किश चिर पैहले 16 ओवरे च 2 विकेटें दे नुक्सान पर 83 रन्ज बनाई लैते दे हे।



Haj Dates

हज यात्रा लेई प्रक्रिया पूरी करने दी खीरी तरीक बधाइयै 25 जनवरी करी दिती गई ऐ। अल्पसंख्यक मामल मंत्रालय नै साफ कीता ऐ जे इस तरीक दे बाद कोई बाददू टैम नैई दिता जाहगा। मंत्रालय नै इस बरे हज करने दी इच्छेया रखने आहले लोकें गी आग्रह कीता ऐ जे ओ 25 जनवरी तगर अपनी हज बुकिंग ते होरनें दस्तावेजें गी मुकदा रुप देई देन। शरदालुएं गी सलाह दिती गई ऐ जे ओ अपने वैद्य पासपोर्ट अपने हज ग्रुप आयोजक कश या सरबंधित दफ्तर च जमा कराई देन ते पोर्टल पर अपनी रजीस्ट्रेशन दा ब्योरा बी दर्ज करी देन।

Manikarnika Ghat

उत्तर प्रदेश सरकार नै इक बारी परतियै एह गल्ल साफ कीती ऐ जे वाराणसी दे मणिकर्णिकाघाट पर चलै करदे मरम्मत ते रख-रखाव दे कम्मै दे चलदे कुसै बी मूर्ति गी कोई नुक्सान नैई पुज्जा ऐ। शैहरी विकास मंत्री ए.के. शर्मा होरें जानकारी दिती ऐ जे मणिकर्णिका घाट इलाके च बुनियादी सुविधां उपलब्ध कराने लेई सरकारै एह निर्माण कम्म शुरु कीत गेदे न। जिला अधिकारी सत्येन्द्र कुमार होरें बी आखेया ऐ जे सोशल मीडिया पर बेबुनियाद ते भडकाऊ खबरां फैलाइयां जा रदियां जे इनें कम्में दे चलदे मूर्तियां तोड़ियां जा रदियां न। पर ऐसा किश बी नैई ऐ ते सब्बनें मूर्तियें गी ढंगै सिर सांबियै सुरक्षत रखेया गेदा ऐ ते कम्म पूरा होने दे बाद उनेंगी परतियै अपनी-अपनी थाहरै पर स्थापित करी दिता जाहगा।

<><><><><><>

Weather

मौसम विभाग नै अगले त्रंऊ दिनें यानि अज्जै कोला लेइयै 19 जनवरी धोड़ी पंजाब ते हरियाणा च हलके कोला दरमयाने दर्जे दी बरखा बरने दे आसार दस्से न। अज्ज 17 जनवरी गी पंजाब सनें होरनें केई राज्यें च घनी धुंध रेही ते तापमान बी सामान्य कोला हेठ दर्ज कीता गया। मैहकमे मुजब कल ते अतरु हलकी बरखा दे आसार न- पर 20 तरीक मौसम खुशक रौहने दे बाद 21 तरीक परतियै बरखा बरी सकदी ऐ।

<><><><><><>

Kurian PM BVY

केन्द्र सरकार च राज्य मंत्री जॉर्ज कुरियन ने अज्ज आखेया ऐ जे प्रधानमंत्री विकसित भारत रोजगार योजना कन्नै देश भरै दे नौजवानें आस्तै रोजगार दे मते मौके पैदा होगंन। केरल दे कोट्टायम च उनें आखेया ऐ जे केन्द्र दी किश योजनाएं च हाल च गै कीते गेदे बदलावें दा मकसद एह यकीनी बनाना ऐ जे उन्दा लाह समाज दे बड्डे वर्गे तगर पुज्जै। श्री कुरियन नै आखेया ऐ जे रोजगार सृजन केन्द्र सरकार दी मुख पैहल ऐ। उनें आरोप लाया ऐ जे राज्य सरकार केन्द्रीय योजनाएं गी प्रभावी ढंगै कन्नै करियै आर्थिक संकट थमां उब्भरनें आस्तै मते प्रयास नैई करै करदी।

<><><><><><>